

# 2 TESALONAIKA

## Pepa Paulo iŋgere muli panzi kalo-tawana tamâta simo Tesalonaika lawea

Paulo iŋgere ŋgua panzi kalo-tawana tamâta simo Tesalonaika lawea (1 Tesalonaika), aku nzimona pinde ilâ lâ, ŋineŋga iŋgere ŋgua pinde panzi kilo. Nenzi kazâŋa tamâta siveta kenzi sakamao ndo panzi ŋana nenzi kalo-tawana kâ, aku kinzi pinde ilonzi patea tu Maro ŋjalae nde itaulo imâ lâ, kala sikai nâna koa tia nâ. Mine kala Paulo itunzi sondo ku iŋgere ŋgua panzi tu Yesu ŋandai itaulo imâ ŋga. Malia kie-kie pinde ma ipâŋga muŋga lâ ŋga, andeta kinda ma tamandi kaika ku kalonda tawana Yesu sondo ndo. Paulo ipainzi tu ma sikai wulitia ndimo, ma sio tininzi pa Maro ŋjalae nâ.

---

**1** <sup>1</sup> Maka ŋato, Sailas ŋga Timoti ŋga naŋa Paulo warakâŋgu, maka kamo taitu, kala naŋa aŋgere ŋgua ŋine imâ pa miki kalo-tawana tamâta kamo Tesalonaika lawea, miki ŋinde uru kalomi tawananzi Tamânda Maro Kindeni kuku Maro Yesu Kirisi rua. <sup>2</sup> Tamânda Maro Kindeni kuku nenda Maro Yesu Kirisi rua nenzi wisi-wisi wa wisi-pisi wa imâ pami.

**Kinzi Tesalonaika ŋgu uru simandi kaika lâ zo ŋana malia ipâŋga panzi ŋana nenzi kalo-tawana kâ**

<sup>3</sup> Nima-nambwe wukale, maka uru zo zo kaloma ŋgere ŋana miki kâ, aku kawama ndaŋge ilâ pa Maro Kindeni. ŋine nde ara pa maka tu kaveta mine, ŋana tu nemi kalo-tawana nde ipâŋga kaika lâ, aku miki râŋani taitu-taitu nemi mâsi ŋana tinimi mwasa nâ panzi tinimi pinde nde itumbu ŋjalae lâ. <sup>4</sup> ŋana duvi ŋine kâ, lâ zo ŋana maka kalâ kakalelenzi Maro Kindeni ne tamâta lâ lawea pinde, ande maka uru kasuka miki ŋami kâki. Maka uru kaporo pwataki panzi ŋana mâsi potomule tamâta pinde siveta pami, aku katapâri panzi ŋana malia kie-

kie rârâni uru ipânnga pami ñana nemi kalo-tawana kâ. Aku maka kaporo ñgua mine panzi tona: “Kinzi ñgu lâ Tesalonaika lawea nenzi kalo-tawana ikeno kaika lâ, kala sikale nenzi malia wa nâna ñinde rârâni”.

<sup>5</sup>Malia mine ipânnga pami ñana nemi kalo-tawana kâ, andeta Maro Kindeni isukami ñana kakale malia ñinde. Mine kala kinda tasama tu Maro Kindeni iveta mâsi sondo ndo, ñana tu malia ñinde uru ikai wurâta lâ ilomi kalomi. Aku muli ñga miki ma kapânnga tamâta sondo ndo, ikura ñana kamo kuku i. <sup>6</sup>Maro Kindeni ma iveta mâsi sondo mine pami: i ma ipare nia panzi tamâta ñinde uru siveta kenzi sakamao pami. <sup>7</sup>Aku i ma pwareâña ilua miki tamâta ñinde uru kakale malia, aku ma pwareâña ilua maka mine nâ. Maro Kindeni ma iveta mine lâ zo ñana Maro Ñjalae Yesu tavanzi ne aņelo kaika rârâni ma sipile samba lawea ku sindue simâ sipânnga nia yo lâ tamâta naonzi. Kinzi ma simâ sipânnga tava yââ ne melamela. <sup>8</sup>Ñineñga i ma ipare nia panzi tamâta ñinde uru tininzi pwâka tu sisama i kilala, kinzi ñinde sipu mulinzi pa pâri ara ñana nenda Maro Ñjalae Yesu Kirisi kâ. <sup>9</sup>Maro Kindeni ma ipare nia panzi tamâta ñinde lâ vetâña mine: i ma ñjaranzi simo niaka ndo ñana Maro Ñjalae tava i ne sinâla wa kaika wa, aku ma simo sakamao mine ku simo nâ. <sup>10</sup>Lâ zo ñjalae ñinde, ande Maro Ñjalae ma imâ ñana ikai paneâña tava ndekâña lâ i ne tamâta kawanzi, kinzi ñinde uru kalonzi tawana i. Aku miki kala ma kandeka kunzi mine nâ, ñana tu nemi kalo-tawana nde keno kaika pa Maro Kindeni ne ñgua maka muñga katula pami ñinde.

**Paulo ikai noña pa Maro Kindeni tu ma isukanzi kalo-tawana tamâta simo Tesalonaika lawea**

<sup>11</sup>Mine kala ikura zo rârâni maka kano pa nenda Maro Kindeni tu ma ivilami. Maka kakai noña tu i ma ivetami kamo kaika ndo lâ vetâña ara ndia muñga ipatea pami tu kaveta ñinde. Aku maka kano tu i ne walo ma isukami, ñana miki ma kakura ñana kaveta vetâña ara ndia nemi kalo-tawana itula pami ñinde. <sup>12</sup>Aku lâ zo ñana i ma iveta mine pami, ande nenda Maro Ñjalae Yesu ña ma ipânnga ñjalae. Aku i kala ma isuka miki ñami kâki mine nâ. Nenda Maro Kindeni kuku Maro Ñjalae Yesu rua nenzi wisi-wisi ma iveta vetâña ñinde ipânnga.

**Kiesaka Tamwata ma imâ ipânnga**

**2** <sup>1</sup>Nima-nambwe wukale, kala ñine maka iloma tu kaporo ñgua ñana nenda Maro Ñjalae Yesu Kirisi ne zo ñana itaulo imâ kilo kâ. Lâ zo ñinde, Maro Kindeni ma igona kinda rârâni talâ taitu kuku Maro Ñjalae. Ande maka kanomi tu katambira tañami sondo ñana nema ñgua ñine kâ. <sup>2</sup>Tiambo tamâta pinde siporo ñgua pami tâ, aku sipananami tu Maro Ñjalae ne zo nde ipânnga lâ. Tiambo tamâta tonje ipaimi tu Koroani Sapâña itula ñguani ndaina papa i tâ. Tiambo tamâta tonje

ingere ŋgua lâ pepa tini pami tâ, ku ilâŋe itu lâ maka tinima tu makani kaŋgere ŋguani ndaina. Ambo miki kaloŋo ŋgua kaŋa mine tâ, ande miki ma wisimi motu walele ku ilomi rârâ ndimo. <sup>3</sup>Miki ma kalomi tawana tamâta tonŋe ne ŋgua laŋeŋa ndimo. Kaloŋo ŋga; zo ŋalae ŋinde ma imâ ipâŋga nâ, ande tia. Tamâta rârâ ma sipu mulinzi pa Maro Kindeni muŋga lâ ŋga. Aku lâ zo ŋinde, Kiesaka Tamwata ma imâ ipâŋga nia yo lâ tamâta naonzi. I nde tamâtani ndaina Maro Kindeni ma muli izavaru lâ yââ ŋalae ne mbââ ilo. <sup>4</sup>I ma ikai kazâŋa pa maro ndia wa kelekele ndia rârâni tamâta uru siwâŋgi ku sipanea ŋinde. Aku i ma ipasuka tamwata ŋa kâki lâ, ku ma itawa kelekele ŋinde rârâni ndue lâ. Andeta ŋinde nâ tia; i ma isaŋona Maro Kindeni ne luma sapâŋa ilo, ku ma iporo tu, “Naŋa warakâŋgu nde Maro Kindeni.”

<sup>5</sup>Muŋga, lâ zo ŋinde naŋa amo kumi, ande naŋa aporo ŋgua pwataki pami ŋana vetâŋa ŋinde kâ. Tiambo miki kalomi kapa ŋana, a? <sup>6</sup>Kala lâ zo ŋine, kelekele tonŋe isae nzâla ŋana tamâta ŋinde kâ, kala ikura tu ipâŋga nia yo lâ tamâta naonzi, ande tia. Kelekele ŋinde, ande miki kasama lâ. Tamâta ŋinde ma ipatua lâ zo ndia Maro Kindeni muŋga ipatea papa tu ma imâ ipâŋga. <sup>7</sup>Miki kasama tu kala zo ŋine kiesaka ne walo uru ikai wurâta paveâŋa nâ lâ tâno kulu. Ŋinde ma ipavea mine lee, ikura lâ zo ndia Maro Kindeni ma ikai tamâta ŋana isae nzâla kaika kâ ŋinde, ku ma io i lâ nia ŋgaŋe. <sup>8</sup>Ŋineŋga Kiesaka Tamwata ŋinde ma ipatua lâ tamâta naonzi. Andeta muli, lâ Maro Ŋalae ne zo ŋana itaulo imâ kilo kâ, ande i ne Koroani tava ne sinâla ŋinde ma ipu Kiesaka Tamwata ŋinde pâta imâte. <sup>9</sup>Sadana ne walo ma io Kiesaka Tamwata ŋinde imâ ipâŋga nia yo lâ tamâta naonzi. Aku Sadana ne mâsi laŋeŋa ma isuka i ŋana iveta mâsi kaika kie-kie pinde wa itula vetâŋa kie-kie pinde wa. <sup>10</sup>Aku laŋeŋa ne vetâŋa potomule kie-kie ŋinde ma ilaŋenzi tamâta, kinzi ŋinde uru soka nzâla ŋinde ilâ pa mateŋa kâ. Maro Kindeni ma izavarunzi tamâta ŋinde ndo, ŋana tu muŋga kinzi siloŋo i kawa ŋgua mao, andeta tininzi pwâka tu sipono muli pa ŋgua ŋinde. Ambo kinzi muŋga sipono muli pa ŋgua ŋinde, ande Maro Kindeni ma ikainzi piti lâ kondoma ilo ku ma via mao ilanzi. Andeta tia. <sup>11</sup>Ŋana duvi ŋinde kâ, ande Maro Kindeni ivea ilo-kalo ara ŋananzi. Mine kala kinzi kalonzi tawana ilo-kalo laŋeŋa nâ. <sup>12</sup>Mao nâ, kinzi tamâta ŋinde tininzi pwâka tu kalonzi tawana ŋgua mao, aku ilonzi ndeka ŋana mâsi potomule nâ. Mine kala Maro Kindeni ivea ilo-kalo ara ŋananzi, kala kinzi rârâni ma sikai vetâŋa soki ŋinde ne pareŋa-nia.

**Maro Kindeni ipatea tu ma ikainzi kalo-  
tawana tamâta piti lâ kondoma ilo**

<sup>13</sup>Aŋga nima-nambwe wukale, Maro Ŋalae ilo ndo keno pami. Ara ŋana maka ma kawama ndaŋge pa Maro Kindeni ŋana miki kâ ikura

zo zo, ɲana tu nia ndoyo i ilo patea tu ma iyautemi piti lâ kondoma ilo ku via mao ilami. Mine kala ɲana Koroani Sapâɲa ne walo kê, ande Maro Kindeni ivetami kapâɲga mbâra-mbâra ndo lâ i nao, aku isukami tu kalomi tawana i ne ɲgua mao tona. Mao nâ, Maro Kindeni iyautemi piti lâ kondoma ilo lâ nzâlani ndaina. <sup>14</sup>Maro Kindeni ipatea tu miki ma kamo kuku nenda Maro Ɔjalae Yesu Kirisi ku kakai i ne walo wa sinâla kaika ɲinde. Mine kala isukami ɲana kalonjo ku kalomi tawana i ne pâri ara muɲga katula pami ɲinde. <sup>15</sup>Mine nde nima-nambwe wukale, ara ɲana miki ma kamandi kaika, aku kapaveta kuku Maro Kindeni kawa ɲgua râràni maka katula pami wa kanjere lâ pepa tini ku kao imâ pami ɲinde tona.

<sup>16</sup>Tamânda Maro Kindeni ilo ndo keno pa kinda, kala io ne wisi-wisi imâ pa kinda lâ. Aku i ne wisi-wisi ɲinde iveta nzâla pa kinda tu ma tamo ara mine ku tamo nâ. Mine kala kinda tandeka ikura zo zo, ku tao tininda ɲana zo muli ɲinde i ma iveta kie ara ndo pa kinda. Maka kano pa Maro Kindeni kuku nenda Maro Ɔjalae Yesu Kirisi rua tu <sup>17</sup>ma sipu tini kaika pa miki ilomi kalomi, ku ma sisukami ɲana kapaveta kuku vetâɲa ara râràni ku kaporo ɲgua ara nâ.

#### Paulo ilo tu kinzi ma sikai noɲa pa Maro Kindeni tu isuka i

**3** <sup>1</sup>Nima-nambwe wukale, maka nema ɲgua tonje keno mine: ara ɲana miki ma kano pa Maro Kindeni tu ivilama, ɲana Maro Ɔjalae kawa ɲgua ma ipalilu ikura nia nia ilâ ipâɲga ɲalae. Aku ara ɲana miki ma kano papa i tu tamâta râràni ma sipaveta kuku i kawa ɲgua ɲinde ku sindeka ɲana, itogo miki muɲga kaveta mine.

<sup>2</sup>Aku ara ɲana miki ma kano pa Maro Kindeni tu ma ikai maka piti lâ kinzi tamâta sakamao mbaunzi ilo, kinzi ɲinde uru siveta vetâɲa potomule. Ɔjana tu tamâta pinde ɲandai kalonzi tawana Maro Ɔjalae ɲga. <sup>3</sup>Andeta Maro Ɔjalae uru iveta ikura ne ɲgua pâɲa râràni. Mine kala kinda kalonda tawana tu i ma ipu tini kaika pami wa ikatonami wa, kala Sadana ma ikura tu iveta mâsi tonje pami, ande tia. <sup>4</sup>Maro Ɔjalae itula pwataki pa maka tu miki uru kaveta vetâɲa râràni maka katula pami ɲinde. Aku maka kaloma tawana tu muli ɲga miki ma kaveta mine nâ. <sup>5</sup>Maka kano pa Maro Ɔjalae tu i ma ikai poe sondo pa nemi ilo-kalo, ɲana miki ma kapaveta kuku Maro Kindeni ne mâsi ɲana tini-mwasa kê, aku ma kapaveta kuku Yesu Kirisi ne mâsi ɲana imandi kaika ku ikale malia kê tona.

#### Paulo iporo kaika panzi tu ma sikai wulitia ndimo

<sup>6</sup>Nima-nambwe wukale, maka kakai nenda Maro Ɔjalae Yesu Kirisi ndamwa ku kaporo ɲgua kaika pami mine: ambo kalo-tawana tamâta pinde uru siveta wurâta tia, aku tininzi pwâka tu sipaveta kuku vetâɲa

ndia maka muŋga kapananami ŋinde, ande miki ma tinimi piti ŋananzi. 7Ŋana tu miki warakami kasama ŋine; ambo miki ma kapaveta kuku maka nema vetâŋa, ande ŋinde nde ara ndo. Muŋga, lâ zo ŋinde maka kamo kumi, ande maka kakai wulitia tia ndo. 8Maka ŋandai kakai kâpwa pinde koa tia nâ lâ miki mbaumi ŋga; maka kako nâ. Maka kaveta wurâta ŋalae tina ikura kari wa mbo wa, kala ŋandai kaveta malia pa nawalami tamâta tonŋe ŋga. 9Lâ zo ŋinde, ambo maka iloma tu kakai kâpwa wa kelekele koa tia nâ lâ miki mbaumi, ande ara, maka ma kakai nâ. Andeta maka kaveta mine tia, ŋana tu maka katu katula mâsi ara nâ pami ŋana kapaveta kuku. 10Miki kasama tu muŋga, lâ zo ŋinde maka kamo kumi, ande maka uru katula tukuŋa mine pami: ambo tamâta tonŋe ikai wulitia ku tini pwâka tu iveta wurâta, ande miki ma kâpwa kalua i ndimo.

11Andeta lâ zo ŋine maka kaloŋo pâri ŋananzi nawalami tamâta pinde tu kinzi siveta wurâta tonŋe tia. Aku kinzi uru siporo ŋgua nao-muli ŋana tamâta pinde nenzi wurâta wa kelekele wa. 12Mine kala ŋine maka kakai nenda Maro Ŋalae Yesu Kirisi ndamwa, aku kaporo ŋgua kaika mine ilâ panzi tamâta ŋinde tu, “Miki kalomi ŋgere sondo ŋga, aku kaveta wurâta ŋana kapakatona warakami ŋana kâŋa-nuŋa kâ”. 13Aŋga nima-nambwe wukale, miki ma kakai wulitia ŋana kaveta vetâŋa ara kâ, mine ndimo.

14Ambo tamâta tonŋe tini pwâka tu ipaveta kuku ŋgua rârâni maka kaŋgere lâ pepa ŋine tini, ande miki ma ilomi patea i kilala sondo, aku tinimi piti ndo ŋana i kâ. Ŋineŋga i tamwata ma mai ŋana i ne mâsi ŋinde. 15Taitu miki ma kamora tamâta ŋinde itogo nemi kazâŋa tamâta, mine ndimo. Kamora i itogo nima-nambwe mine, aku kaporo ŋgua ara pinde papa ŋana kaveta i ilo kalo ara kâ.

### Paulo iporo wisi-ara ne ŋgua panzi

16Maka kano pa Maro Ŋalae, ina wisi-pisi warika, tu i ma iveta miki wisimi pisi nâ. Ŋineŋga lâ zo ŋana vetâŋa tonŋe ma imâ ipâŋga pami, ande miki ma kamo tava wisimi pisi mine nâ. Maro Ŋalae imo ku miki rârâni.

17Naŋa Paulo warakâŋgu mbaunŋu aŋgere wisi-ara ne ŋgua ŋine imâ pami. Naŋa uru aŋgere wisi-ara ne ŋgua mine lâ nanenŋu pepa rârâni tininzi. Ŋinde itula nanenŋu pepa kilala ipâŋga nia yo pami.

18Nenda Maro Ŋalae Yesu Kirisi ne wisi-wisi imâ pa miki rârâni.